

BAB IV

PERKUMPULAN WANITA PEKEBUN KECIL (PWPK)

4.1 Pendahuluan

Boleh dikatakan separuh daripada masyarakat pekebun kecil adalah terdiri daripada kaum wanita. Dalam usaha kita untuk membangunkan masyarakat pekebun kecil melalui pemodenan sikap dan cara mereka bertindak, kaum wanita tidak boleh diketepikan lagi. Kita tidak dapat menafikan hakikat bahawa dalam menentukan kesejahteraan dan kemajuan keluarga, kaum wanita khususnya kaum ibu memainkan peranan yang sangat penting. Dari itu untuk membaiki lagi keadaan yang terdapat sekarang ini, wanita perlu diberi latihan dan bimbingan dalam hal-hal yang berkaitan dengan pengurusan rumahtangga, juga latihan dari segi ekonomi.

Untuk mencapai tujuan ini, maka RISDA telah mengadakan projek Perkumpulan Wanita Pekebun Kecil (PWPK) yang ditubuhkan pada awal tahun 1978.

4.2 PWPK Segara Am

PWPK telah ditubuhkan pada awal tahun 1978 di kampung-kampung di mana telahpun tertubuhnya Pusat Pembangunan Pekebun Kecil (PPKK).

PWPK ini terbuka kepada semua kaum wanita ahli keluarga pekebun kecil yang berumur tidak kurang daripada tigabelas tahun (13). Setiap wanita yang ingin menjadi ahli diperlukan untuk mengisi borang untuk menjadi ahli dan seseorang ahli itu akan kemudiannya diluluskan

oleh Jawatankuasa yang dilantik oleh ahli-ahli PWPK.

Tiap-tiap wanita yang telah diterima untuk menjadi ahli PWPK akan membayar yuran pendaftaran sebanyak (\$1.00) seringggit manakala yuran bulanan pula ialah sekurang-kurangnya dua puluh sen (20 ¢) atau dua ringgit dan empat puluh sen (\$2.40) setahun atau lebih. Selain daripada membayar yuran bulanan, kadangkala ahli-ahli dikehendaki membayar yuran atau belanja demonstrasi memasak, projek ekonomi dan lain-lain.

Perjumpaan diadakan sekurang-kurangnya seminggu sekali dan ahli perkumpulan akan berkumpul untuk mengikuti satu-satu pelajaran samada berupa demonstrasi masakan, jahitan, pertanian ataupun mendengar ceramah-ceramah dalam soal berkaitan dengan kesihatan, ugama dan berbagai aspek pentadbiran rumahtangga dan keluarga.

Pegawai RISDA juga ditempatkan untuk mengawasi, memimpin, menasihati dan kadangkala sebagai jurutunjuk demonstrasi. Selain daripada itu, RISDA juga menjemput pegawai-pegawai dari jabatan lain seperti KERAS, pegawai kesihatan, pegawai ugama dan lain-lain dalam usaha mengadakan kelas-kelas dan ceramah-ceramah dalam bidang kesihatan dan ugama sebagai contoh.

Dalam kelas-kelas kemahiran RISDA menjemput atau mengajikan orang yang berpengalaman dan diberikan wang atau pendapatan yang sederhana sebagai wang saku. Begitu juga Ahli Jawatankuasa dibayar gaji serendah-rendahnya mengikut keadaan kewangan perkumpulan.

Setakat ini dikatakan bahawa terdapat 485 buah PWPK telahpun ditubuhkan di semua negeri dengan keahlian berjumlah 10,785 (lihat data 3).

PWPK mengadakan aktiviti ekonomi, kelas-kelas dan ceramah bersabit dengan urusan rumahtangga, kesihatan, pendidikan anak-anak dan ugama yang akan dijalankan oleh bahagian-bahagiannya sendiri Projek Niaga, Seksi Pendidikan dan Seksi Rekreasi dan Sosial.

4.3 Tujuan-tujuan PWPK

PWPK merupakan sebuah projek yang diadakan oleh RISDA dalam usaha memberi bimbingan dan tunjukajar pada kaum wanita pekebun kecil dalam soal menguruskan rumahtangga dan keluarga mereka supaya matlamat meninggikan taraf hidup masyarakat pekebun kecil terlaksana.

PWPK ini mempunyai tujuan-tujuan tertentu iaitu tujuan jangka-
pendek dan tujuan jangka panjang.

Tujuan jangka panjang PWPK ialah untuk mengujudkan semangat kemasyarakatan di kalangan wanita pekebun kecil di samping mendapatkan latihan dan bimbingan yang boleh membawa ke arah meninggikan taraf hidup dan mutu keluarga yang mana seterusnya akan membawa kepada masyarakat pekebun kecil yang sihat dan progresif.

Manakala tujuan jangka pendek pula ialah:

Pertama, memberi peluang kepada kaum wanita pekebun kecil

mengambil bahagian yang cergas dalam kehidupan dan kemajuan masyarakat pekebun kecil.

Kedua, untuk memberi peluang kepada kaum wanita untuk bertukar-tukar fikiran dan pengetahuan dengan ahli-ahli mahupun dengan tenaga pengajar.

Ketiga, ia bertujuan untuk menggalakkan wanita pekebun kecil menceburkan diri dalam kegiatan-kegiatan ekonomi untuk menambahkan pendapatan juga melibatkan diri dalam kegiatan ekonomi.

Keempat, PWPK diadakan untuk memberi latihan dan bimbingan mengenai aspek-aspek berikut:

- Kesihatan dan kebersihan
- Makan dan pemakanan
- Penjagaan dan pendidikan anak-anak
- Menyediakan makanan memasak
- Membuat dan menjaga pakaian
- Menguruskan ekonomi keluarga
- Tanaman dan ternakan
- Pekerjaan atau pertukangan tangan
- Latihan rohani dan keugamaan
- Lain-lain pengetahuan dan kemahiran yang boleh menolong tugas seorang wanita dan ibu

Kelima, PWPK bertujuan untuk memupuk semangat dan kemahiran kepimpinan di kalangan kaum wanita pekebun kecil melalui penubuhan jawatankuasa untuk mentadbirkan perjalanan PWPK.

Jelas di sini bahawa PWPK mempunyai tujuan-tujuan yang tersendiri dalam usaha meninggikan mutu kehidupan dan secara tidak langsung dapat menambahkan pendapatan pekebun kecil.

4.4 Pentadbiran PWPK

Oleh kerana adanya berbagai-bagai seksi tadi maka PWPK mempunyai jawatankuasa sendiri yang dipilih di kalangan ahli mereka tanpa mengira siapa, untuk memastikan projek ini berjalan dengan licin. Syarat untuk menjadi ahli jawatankuasa adalah tidak berat cuma mereka yang terpilih oleh orang ramai ini telah mendapat kepercayaan kerana sikapnya, kehadirannya dan penglibatannya yang memuaskan.

Jawatankuasa ini terdiri daripada seorang Pengerusi, seorang Naib Pengerusi, seorang Setiausaha, seorang Bendahari dan tiga orang Ketua-ketua Bahagian. (Lihat Data 3). Pentadbiran jawatankuasa ini adalah di peringkat komuniti.

Tempoh bagi perkhidmatan jawatankuasa PWPK ialah selama setahun dan orang baru akan dipilih dalam Mesyuarat Agung Tahunan yang lain. Walaupun jawatankuasa ini berkuasa hanya setahun tetapi kadangkala dinasihatkan supaya memegang jawatan yang sama selama tiga tahun jika mereka ini dikehendaki oleh ahli-ahli. Akan tetapi satu-satu jawatan itu tidak boleh dipegang selama tiga tahun berturut-turut untuk memberi peluang pada ahli yang lain pula.

Di dalam bahagian-bahagian yang tertentu (seperti dalam

Data 1) iaitu ketiga-tiga bahagian ini, jawatankuasa kecil bagi tiap-tiap bahagian ini dibenarkan penubuhannya di bawah tiap-tiap ketua bahagian dan jumlah ahli jawatankuasa kecil tadi terpulanglah kepada jawatankuasa perkumpulan menentukannya.

Mengikut peraturan yang ditetapkan apabila seorang ahli jawatankuasa yang tidak datang menghadiri Mesyuarat Jawatankuasa sebanyak tiga kali berturut-turut tanpa alasan yang munasabah maka dengan sendirinya lucut dari menjadi ahli jawatankuasa dan tempatnya diganti oleh orang lain.

Jawatankuasa PWPK ini mempunyai tugas-tugas masing-masing bagi melicinkan perjalanan perkumpulan mereka.

Bagi seorang Pengerusi tugasnya ialah untuk menguruskan semua Mesyuarat Jawatankuasa (J/K) Mesyuarat Agung, memimpin segala aktiviti-aktiviti perkumpulan dan ahli-ahlinya di perjumpaan-perjumpaan luar.

Naib Pengerusi pula bertugas untuk membantu Pengerusi dalam semua hal dan dalam masa ketiadaan Pengerusi, maka Naib Pengerusi akan menjalankan tugas-tugas Pengerusi.

Setiausaha bertugas untuk menguruskan segala surat menyurat bagi pihak perkumpulan, menulis serta menyimpan segala minit-minit mesyuarat.

Manakala bagi Penolong Setiausaha ia bertugas untuk membantu

Setiausaha menguruskan segala tugas-tugasnya dan juga semasa ketiadaan Setiausaha dalam masa mesyuarat maka ia akan menjalankan tugas-tugas Setiausaha.

Tugas Bendahari agak berat kerana ia bertanggungjawab atas kewangan perkumpulan. Ia mengumpulkan segala yuran dan menyimpan buku kira-kira wang masuk dan keluar serta menyediakan penyata kira-kira bulanan, penyata kira-kira tahunan serta menyimpan resit-resit dan boucer-boucer di dalam fail.

Akhir sekali bagi tiga-tiga Ketua Bahagian, bertugas untuk memimpin ahli-ahli dalam aktiviti bahagian masing-masing mendapatkan lebih banyak ahli dari kawasan mereka, membantu jawatankuasa dalam menyibarkan waktu, tempat dan lain keterangan mengenai perjumpaan umum, mengutip yuran dan menyelidik serta mengkaji kemahuan dan minat ahli-ahli mengenai aktiviti-aktiviti yang sedang dan akan dijalankan untuk dijadikan asas merancang aktiviti perkumpulan. Ketua Bahagian ini dibahagikan kepada projek niaga, aktiviti pendidikan dan rekreasi dan kemasyarakatan. (Data 3)

4.5 Projek Niaga

Seksi ini ialah seksi ekonomi yang bertujuan untuk menggalakkan kaum wanita pekebun kecil menggunakan kemahiran yang ada bagi menjalankan usaha menambah pendapatan.


Aktiviti yang dijalankan di bahagikan kepada 4 bahagian iaitu:

DATA 2 : LAPORAN KEMAJUAN PMPK BAGI TAHUN 1982

Negeri	Bilangan PMPK	Bilangan Ahli	Purata Ahli dlm. Tiap-tiap PMPK	Bilangan Projek Ekonomi	Purata Wang Taburan Bagi Tiap-tiap satu Projek Ekonomi (\$)	Wang Tabungan (\$)	Purata Wang Tabungan Bagi Tiap-tiap Bilangan PMPK (\$)
Kedah	35	502	14	7	\$237.44	1662.10	47.48
Johor	67	1580	24	29	268.04	7773.20	116.0
Kelantan	87	1795	21	18	357.46	6434.38	73.95
Perak	70	1655	24	16	178.83	2861.30	40.87
Trengganu	47	1245	26	8	1520.28	4162.30	88.55
Selangor	50	1171	23	34	195.44	6645.25	132.90
Melaka	30	740	25	19	189.57	3601.89	120.06
Pahang	54	1070	20	24	312.02	7488.50	138.67
N. Sembilan	45	1027	23	24	391.15	9387.79	208.61
Jumlah	485	10785	22	179	256.16	48,854.11	94.54

Sumber: Laporan Tahunan Bahagian Pembangunan Socio-Ekonomi 1982 (RISDA 27.4.83)

DATA 3: STRUKTUR ORGANISASI PMPK



Sumber: *Kisalah Keluaran PMPK* Bahagian Kemajuan Oktober 1963

- A. Memproses makanan
- B. Jahitan dan kraftangan
- C. Tanaman kontan
- D. Lain-lain

Dalam memproses makanan ahli-ahli membuat bahan makanan seperti mee, mihun, tauhu, tempe, kicap dan taueh. Tidak ketinggalan juga mereka membuat makanan ringan seperti kerepek pisang, cakar ayam, rempeyek, kacang dan lain-lain. Bahan-bahan makanan seperti jem, jeruk, acar, halwa, serikaya, lempuk juga dibuat oleh wanita PWPK ini. Mereka ini akan membuat bahan-bahan ini sekurang-kurangnya seminggu sekali tetapi jika permintaannya banyak maka mereka akan melakukannya sebanyak dua atau tiga kali seminggu misalnya membuat mee kering yang kini mendapat pasaran daripada pekedai-pekedai. PWPK Air Panas di Jasin, Melaka (lampiran gambar) kini telah mendapatkan pasaran yang agak memuaskan. Ahli-ahli yang membuat adalah secara sukarela di mana mereka akan mengumpul modal untuk memulakan projek ini melalui kutipan saham dari ahli-ahli yang bersetuju menyertai projek berkenaan. Nilai satu saham adalah ditentukan oleh ahli-ahli sendiri dan seorang ahli boleh memberikan beberapa yang ia mampu tetapi tidak mesti melebihi dua puluh peratus (20%) daripada nilai jumlah saham yang dikeluarkan.

Setelah wang dikutip maka wanita akan membuat makanan tersebut dan dijual. Selain daripada PWPK Air Panas Jasin, Kampung Jawa Kelang juga di Hulu Selangor juga membuat mee kuning dengan banyak untuk di

pasarkan. Selain daripada itu di Kampung Bukit Keledeng ahli-ahli PWPK membuat makanan ringan seperti kerepek pisang, cakar ayam, jeruk dan dijual di kedai PWPK.

Dalam bidang jahitan dan kraftangan wanita-wanita mengambil upah menjahit pakaian, sulaman menyulam, membuat bunga tiruan ribbon, bahan-bahan kering, anyaman daripada pandan, mengkuang, lidi, rotan dan buluh juga diajar. Tidak ketinggalan membuat sarong bantal, kipas, lapik capar daripada benang emas.

Semua kegiatan jahitan dan kraftangan ini telah diajar oleh guru-guru berkemahiran seperti guru KEMAS, atau orang perseorangan yang mahir dan mahu mengajar walaupun gajinya tidak seberapa. Wanita-wanita diberi latihan misalnya (lihat gambar 2) di PWPK Lubok Redam 2, Masjid Tanah Melaka, ahli-ahli PWPK diajar cara menjahit, memotong dan mereka ini menerima upah menjahit. Malahan ada di kalangan mereka yang telah membuka kedai jahit di Air Puteh Kemaman, Trengganu yang lengkap dengan alat-alat dan mesin (lihat gambar 3). Di Kampung Bukit Lada Temerloh, Pahang, ahli-ahli PWPK telah membuat anyaman dari mengkuang, buluh dan lain-lain dan menjualnya di pameran-pameran. Tetapi kini oleh kerana adanya perubahan yang dibuat oleh RISDA, barang-barang ini dijual melalui koperasi Pusat Pembangunan Pekebun Kecil (PPKK) dan di sini pasaran adalah menjaminkan.

Dalam tanaman kontan ahli-ahli wanita PWPK diajar menanam cara-cara yang baik tanaman kobis, terung, bendi, labu, kacang, keledek, pisang, jagong dan lain-lain.

Ini dapat mengurangkan perbelanjaan ahli dengan menanam sendiri lantas dapat menjual secara kecil-kecilan di pasar-pasar malam atau di kedai PWPK yang di bina. Benih-benih tanaman akan diberikan oleh pihak RISDA.

Dalam kegiatan lain pula mereka ini diajar cara menternak ayam, membuka kedai, membuat dan menyewa pelamin dan lain-lain kegiatan yang boleh menambahkan pendapatan. Dalam menternak ayam, ahli-ahli yang berminat akan mengumpul wang dan membeli ayam daripada pejabat yang bertanggungjawab dan membela di rumah. Pegawai-pegawai RISDA akan ke rumah wanita-wanita yang menjalankan kegiatan ini untuk memastikan kegiatan mereka adalah baik, dan memberi subsidi makanan ayam dan lain-lain. Apabila ayam itu telah besar maka ianya boleh dijual dan pendapatan itu adalah untuk mereka. Misalnya di PWPK Batu 9 Kampung Medan, Kuala Langat Selangor usaha menternak ayam dijalankan oleh ahli-ahli yang berminat.

Wanita-wanita pekebun kecil juga diajar dan digalakkan untuk berniaga dan ada di antara PWPK telah mampu untuk membuka kedai ataupun individu perseorangan. Di Kampung Mengkabung II, Kuala Kerai, telah diadakan projek kedai kopi PWPK (lihat gambar 4) yang bukan saja menjual kopi malahan menjual makanan ringan yang dibuat oleh ahli-ahli lain.

Selain daripada kegiatan ekonomi yang disebutkan, ada juga kegiatan yang dilakukan oleh ahli PWPK yang mempunyai kemahiran sendiri seperti membuat pasu dan ini jelas dilakukan oleh PWPK Kampung Batu Hutan di Perak.

Jelas di sini bahawa semua aktiviti yang dijalankan oleh PWPK ialah untuk menambahkan pendapatan keluarga mereka dengan mengusahakan kedai sehinggalah pada membuat lain-lain kegiatan kecil yang boleh mendatangkan hasil.

4.6 Seksi Pendidikan

Seksi ini bertujuan untuk melengkapkan wanita pekebun kecil dengan pengetahuan-pengetahuan yang berkaitan dengan pengurusan rumah-tangga dan keluarga.

PWPK mengadakan aktiviti-aktiviti seperti mengadakan ceramah-ceramah yang membincangkan soal-soal kesihatan, bahaya dadah, simpanan, pelaburan, peranan dan tanggungjawab keluarga ahli-ahli keluarga yang lain. Penceramah ini dijemput oleh ahli-ahli jawatankuasa PWPK dan datang daripada berbagai-bagai agensi kerajaan, Jabatan Ugama serta badan-badan sukarela seperti Persatuan Pengguna, Pemadam dan lain-lain. Ceramah-ceramah ini akan diadakan di Dewan Balai Raya seminggu sekali.

Pendidikan kebersihan ini termasuklah seperti menggalakkan ahli-ahli membuat lubang sampah, membersihkan kawasan dan lain-lain dengan tujuan untuk menggalakkan ahli PWPK menjaga kebersihan rumah dan kesihatan.

Pendidikan ugama diajar dengan tujuan mengembangkan dan memberi panduan dari segi segala aspek keagamaan dan juga mengikut perkembangan semasa yang menerapkan unsur-unsur keagamaan pada ahli-ahli keluarga pekebun kecil. Aktiviti ini diadakan seminggu sekali oleh penceramah

atau individu di kampung itu yang mahir dalam bidang agama.

Selain daripada mendengar ceramah ahli-ahli PWPK menubuhkan kumpulan nasyid dan kumpulan membaca "yassin" seperti yang terdapat di Kampung Sagil Johor. Anak-anak pekebun kecil diberikan asas untuk membaca Quran dan Muqaddam dan guru-guru yang mengajar akan mendapat saguhati yang dibayar oleh ahli-ahli PWPK. Kumpulan-kumpulan nasyid, berjanzi, membaca yassin ini tidaklah timbul ke peringkat nasional cuma di peringkat komuniti saja dan aktiviti ini banyak di Jerantut, Pahang.

Selain daripada pendidikan yang disebutkan di atas, PWPK juga menganjurkan sesi tunjukajar mengenai sesuatu amalan samada yang berkaitan dengan urusan rumahtangga dan keluarga ataupun teknik-teknik perkebunan. Misalnya dalam teknik perkebunan, wanita PWPK diajar cara-cara menoreh dan mendapatkan susu getah yang banyak, menanam pokok anak getah, dan lain-lain hal yang bersangkutan dengan getah.

Akhir sekali dalam seksyen pendidikan ini PWPK mengadakan lawatan-lawatan yang bertujuan untuk mendedahkan ahli kepada pengetahuan-pengetahuan baru demi memperluaskan pandangan dan kefahaman mereka mengenai persekitarannya. Dalam bidang ini selalunya lawatan ini diberikan kepada ahli-ahli jawatankuasa PWPK. Misalnya Pengerusi PWPK Kuala Langat Selangor melawat PWPK Perak di Kampung Batu Hutan untuk melihat aktiviti yang dijalankan oleh PWPK ini. Di Perak mereka membuat pasu maka apabila Pengerusi Kuala Langat pulang maka ia boleh memberi pendapat untuk menjalankan projek seumpama itu. Perbelanjaan lawatan ini selalunya dibiayai oleh pihak RISDA tetapi kini lawatan ini amat jarang dilakukan

memandangkan masa kemelesetan maka RISDA terpaksa mengurangkan
nya.

4.7 Seksi Rekreasi dan Sosial

Seksi ini bertujuan untuk menggalakkan ahli-ahli supaya mengisi
masa lapang dengan aktiviti-aktiviti yang berfaedah di samping memupuk
semangat bekerjasama dan tolong menolong di kalangan ahli.

Aktiviti itu ialah seperti menganjurkan kelas-kelas mengenai
perkara-perkara yang menjadi minat semasa ahli-ahli seperti membuat
bunga dari kain stokin, membuat makrami, mengait dan lain-lain. Lazimnya
perkara-perkara yang diminati adalah bermusim. Misalnya walaupun mereka
ini membuat secara bermusim tetapi ada di antara ahli yang meneruskan.
Kegiatan ini seperti di PWPK Kampung Sepang Salak Tinggi Selangor yang
membuat bunga untuk dijual manakala di PWPK Gombak iaitu Kampung Setia
Kuang menjual hasil-hasil kerja tangan.

PWPK juga menganjurkan kelas-kelas bimbingan untuk anak-anak
yang menduduki mana-mana peperiksaan SRP, SPM dan STPM. Tenaga pengajar
ini boleh didapati daripada kalangan ahli sendiri yang mempunyai kelayakan
atau anak-anak pekebun kecil yang menunggu kerja atau keputusan ataupun
kadangkala mendapat kerjasama guru di sekolah tempatan. Kadangkala tenaga
pengajar ini diberi saguhati yang minima oleh PWPK dan kadangkala mereka
tidak kerana mengajar dengan tujuan sukarela.

Akhir sekali PWPK mengadakan sesi tunjukajar yang bertujuan
untuk menurunkan kepada generasi muda kemahiran-kemahiran tradisi dan
asli seperti membuat masakan lemak, dodol, wajik, lempuk, acar, tapai

dan lain-lain lagi. Tidak ketinggalan juga PWPK mengajar memasak makanan yang moden seperti membuat kek, karipap seperti di PWPK Batu Pahat Johor yang mana gurunya adalah pegawai RISDA sendiri. Kadangkala guru-guru dari KEMAS juga dipanggil malahan kadangkala ahli-ahli PWPK sendiri yang mahir atau mengetahui membuat masakan akan digalakkan untuk memberikan petunjuk pada orang.

Kesimpulannya inilah aktiviti yang dijalankan oleh PWPK sendiri dan ahli jawatankuasa PWPK yang bertanggungjawab terhadap keseluruhan perjalanan PWPK. Harapan RISDA dengan penubuhan PWPK ialah selain dari mengendalikan rumahtangga wanita juga perlu melibatkan diri di bidang yang luar dari rumahtangga, dengan kegiatan-kegiatan yang dapat menambahkan pendapatan keluarga pekebun kecil khasnya melalui penglibatan kaum wanitanya.

4.8 Keberkesanan

Keberkesanan PWPK adalah sukar ditentukan kerana tidak ada data-data yang mencukupi untuk menganalisisnya. Walau bagaimanapun ianya dapat disediakan dengan data-data yang diperolehi. Keberkesanan PWPK ini boleh dilihat dari dua segi iaitu:

1. Keberkesanan dari segi ekonomi
2. Keberkesanan dari segi individu

4.8 a. Keberkesanan Dari Segi Ekonomi

Pertama, dari segi ekonomi PWPK dikatakan tidak berjaya dalam usahanya untuk menambahkan pendapatan bagi pekebun kecil. Jika dilihat dari purata wang tabung bagi tiap-tiap projek ekonomi maka rata-rata kita

DATA: 4 STRUKTUR PROGRAM KEMAJUAN KELUARGA
PEKEBUN KECIL GETAH

PROGRAM KEMAJUAN KELUARGA PEKEBUN KECIL

PERKUMPULAN "ANITA
PEKEBUN KECIL

- PROJEK NIAGA
1. Memproses Makanan
 2. Jahitan dan kraftangan
 3. Tanaman Kontan

- AKTIVITI-AKTIVITI
- Penerangan
 - Bentuk Kumpulan
 - Latihan kemahiran
 - Mengumpul modal
 - Memproses/Laksana projek
 - Membungkus
 - Memasar

- AKTIVITI PENDIDIKAN
1. Pendidikan Keluarga
 2. Pendidikan Ugama
 3. Pendidikan Kesihatan
 4. Pendidikan Pengguna
 5. Pendidikan Teknik-teknik berkebun (Getah)

- AKTIVITI-AKTIVITI
- Demonstrasi
 - Ceramah
 - Perbincangan
 - Lawatan
 - Pertandingan

- REKREASI DAN KEMAJUAN
MASYARAKAT
1. Kelas bimbingan
 2. Kelas Kemahiran
 3. Menyambung Tradisi
 4. Gotong Royong

Sumber: Risalah KISDA Program Kemajuan Keluarga Pekebun Kecil,
Bahagian Perkembangan 19.8.83

lihat jumlahnya ialah \$256.16 (Data 2) bagi setahun. Ini adalah jumlah yang kecil jika dibandingkan dengan 179 projek ekonomi. Seperti yang kita sedia maklum tujuan PWPK ialah untuk menambahkan pendapatan, tetapi jika hasilnya adalah sedikit maka kegiatan-kegiatan ini adalah sia-sia sahaja memandangkan tenaga yang digunakan agak besar tetapi hasilnya adalah sedikit untuk dibahagikan hasil yang telah dijual.

Kedua, dari segi wang tabungan juga adalah kurang kerana didapati setiap PWPK hanya mampu menyimpan wang tabungan mereka mengikut purata bagi tiap-tiap PWPK dalam setahun adalah \$94.54 sahaja. Tidak dapat dinafikan ada di antara PWPK yang mempunyai purata wang tabungannya sebanyak \$208.67 misalnya di Pahang tetapi dengan jumlah ini sukar untuk dikatakan ia berjaya kerana jumlah ini masih dikira bersama dengan yuran bulanan serta lain-lain yuran. Maka di sini kita dapati wang tabungan mereka adalah sedikit sekali jika dibandingkan dengan bilangan PWPK.

Ketiga, PWPK kurang berjaya dalam menarik banyak ahli-ahlinya kerana didapati jumlah purata ahli dalam tiap-tiap PWPK ialah 22 orang. Jumlah ini dewasa ini telah semakin berkurangan kerana ahli-ahlinya yang tidak aktif. Ini adalah disebabkan oleh kesibukan rumahtangga manakala ramai di antara mereka yang tidak berminat langsung dalam menyertai PWPK ini. Misalnya di Kelantan purata ahli bagi tiap-tiap PWPK ialah 21 orang sahaja dan Kedah pula hanya 14 orang (Data 2).

Keempat, PWPK kurang keberkesanannya semenjak RISDA menghentikan wang asas yang diberi pada permulaan. PWPK sebanyak \$500/- maka bilangan PWPK telah menurun, kurang daripada 485 buah cuma yang tinggal adalah

PWPK yang benar-benar tekun dan ada inisiatif sendiri dan yang lain berkubur dan penubuhannya adalah seperti melepas batuk di tangga sahaja.

Walaupun PWPK kurang berjaya namun ada beberapa kegiatan ekonomi yang terus dilakukan oleh PWPK. Antaranya ialah, projek anyaman di Kampung Bukit Lada, Temerloh, Pahang. Mereka ini telah mendapat pasaran daripada badan-badan luar. Begitu juga projek mee kuning yang dijalankan oleh PWPK, Kampung Air Panas Jasin, Melaka dan Kampung Sagil di Johor. Kegiatan membuat bunga juga ada diteruskan oleh PWPK yang mendapat tempahan khas dari hotel-hotel seperti PWPK di Sepang, Selangor.

Keberkesanan ini juga dapat dilihat dari segi susulan peserta setelah mendapat latihan. Antaranya ialah ada di antara peserta yang membuka kedai jahit misalnya di Air Puteh Kemaman, Trengganu. Kedai kopi juga telah dibuka di Kampung Mengkabung II, Kuala Krai, Kelantan oleh bekas ahli PWPK yang menjual juga makanan-makanan ringan. Tetapi mereka yang terus melibatkan diri setelah mendapat latihan ini hanya segelintir sahaja, oleh itu lebih merupakan kekecualian sahaja.

Kesimpulannya dari segi ekonomi, PWPK kurang berjaya dalam usahanya untuk menambahkan pendapatan keluarga pekebun kecil melalui penglibatan wanitanya dalam projek-projek ekonomi yang dijangkakan boleh berbuat demikian.

4.8 b. Keberkesanan Dari Segi Individu

Dari segi individu boleh diandaikan bahawa mereka ini telah berjaya tetapi ini hanyalah andaian kerana tidak ada ukuran yang dapat dilihat memandangkan RISDA sendiri tidak membuat ukuran itu.

Di andaikan bahawa ahli-ahli PWPK melalui ceramah, demonstrasi, perbincangan, lawatan, pertandingan dikata telah mendapat pengetahuan dan kemahiran. Di antaranya ialah ahli PWPK ini kini lebih dedah tentang isu-isu semasa seperti penyalahan guna dadah, kepentingan menabong, dan pelaburan serta tanggungjawabnya di keluarga.

Pendidikan tentang kesihatan juga didapati melalui ceramah di mana mereka diajar cara kebersihan yang baik seperti membuat lubang sampah, membersihkan kawasan dan kesihatan keluarga melalui pemakanan yang seimbang.

Pendidikan agama juga mereka perolehi untuk mengenali agama Islam dengan lebih dekat dan menerapkan unsur-unsur agama pada ahli keluarga mereka. Dalam aktiviti agama ini, didapati PWPK telah dapat menubuhkan kumpulan nasyid secara kecil-kecilan dan kumpulan membaca "yassin" di Kampung Sagil Johor.

Pengetahuan dari segi cara-cara menoreh getah, menanam anak getah juga diperolehi dan ini mungkin dapat digunakan dalam menoreh semasa wanita-wanita ini menolong suaminya keluar untuk menoreh.

Di andaikan juga mereka ini memperolehi pengetahuan dari lawatan-lawatan yang diadakan dari kemahiran kraftangan yang diajar dan demonstrasi memasak.

Melalui bimbingan kelas-kelas yang dianjurkan oleh PWPK juga di andaikan bahawa anak-anak mereka ada yang berjaya melanjutkan pelajaran ke peringkat tinggi.

Kesimpulannya dapat dikatakan bahawa melalui andaian-andaian yang dibuat, dari segi individu, PWPK telah berjaya menerapkan kemahiran pendidikan dan tunjukajar pada ahli-ahlinya. Namun demikian ini cumalah andaian dan tidak dapat dibuktikan kebenarannya kerana tidak ada ukuran-ukuran yang dapat digunakan bagi mengukur kejayaan segala kemahiran, pendidikan dan pengetahuan yang didapati oleh ahli-ahli PWPK.

4.9 Masalah PWPK

Jelas setelah melihat keberkesanan PWPK dikatakan gagal dari segi ekonomi dan di andaikan berjaya dari segi individu-individunya. Kegagalan ini adalah disebabkan beberapa masalah seperti:

Pertama sekali ialah kebanyakan PWPK tidak mempunyai kewangan yang banyak untuk membeli alat-alat, mesin-mesin membeli bahan mentah, mengadakan lawatan dan lain-lain. Ini bertambah buruk apabila bantuan sebanyak \$500/- sebagai wang asas tidak diberi oleh RISDA di sebabkan kemelesetan. Oleh itu alat-alat dan mesin-mesin yang moden tidak dapat diberi maka dengan itu hasil yang dikeluarkan adalah secara kecil-kecilan kerana menggunakan cara yang lama. Misalnya dalam membuat mee kuning, mesin yang banyak tidak dapat dibeli maka hasil akan dihadkan mengikut kemampuan mesin yang ada saja. Ahli-ahli PWPK juga tidak dapat membeli bahan mentah yang baik dan banyak oleh itu adalah dinasihatkan kepada ahli menggunakan bahan-bahan tempatan yang murah. Hal ini kadangkala mengendalakan kerja kerana kegiatan terpaksa diberhentikan atau dihadkan jumlahnya seperti dalam kegiatan anyaman di Pahang.

Kebudayaan juga kurang dapat dikembangkan kerana tidak ada peruntukan untuk membeli alat-alat muzik. Tetapi kini PWPK telah mengadakan sistem saham dalam apa-apa kegiatan yang ingin dijalankan dengan melabur di dalam kegiatan itu dan dengan kutipan wang daripada ahli-ahli maka dengan wang ini boleh dibeli alat-alat yang murah serta bahan mentah.

Kedua, PWPK menghadapi masalah mendapatkan bahan mentah yang murah. Misalnya aktiviti tekad telah dihentikan memandangkan harga benang emas yang mahal. Begitu juga bagi mendapatkan bahan-bahan seperti benang-benang. Tetapi bagi aktiviti memproses makanan ahli PWPK dinasihatkan menggunakan bahan-bahan yang ada di tempat mereka seperti membuat jeruk asam, betik dan lain-lain.

Ketiga, PWPK menghadapi masalah pasaran bagi hasil-hasil yang dikeluarkan oleh mereka. Misalnya di Kampung Sagil Johor aktiviti memproses makanan sukar mendapat pasaran kerana tidak ada saloran yang tetap untuk menerima tempahan. Hal ini menyebabkan pengeluaran terpaksa dihadkan memandangkan pasaran yang kurang.

Keempat, PWPK menghadapi masalah persaingan daripada pekedai-pekedai yang telah terkenal dari segi pasaran, mutu makanan dan pembungkusan. Misalnya dari segi pembungkusan PWPK tidak mempunyai alatnya maka kadangkala makanan di dalam dimasuki serangga dan cepat musnah dan menjadikan mutunya tidak baik. Barangan-barangan PWPK ini kurang mendapat "publisiti" menyebabkan orang ramai masih belum pasti dan yakin dengan keluaran hasil PWPK.

Kelima, PWPK mengalami kekurangan tenaga pengajaran samada dari segi kemahiran, ugama, akademik, kebudayaan dan lain-lain. Pegawai RISDA juga kadangkala yang menjadi tenaga pengajar tidak begitu mahir. Guru-guru yang ada kadangkala tidak mahu mengajar kerana gaji yang diberikan adalah sangat minima maka hanya beberapa orang pengajar sahaja yang sanggup menyumbang tenaga mereka. Jika tidak adanya tenaga pengajar dalam bidang-bidang yang tertentu maka ianya terpaksa dihentikan sementara menunggu guru yang baru dan ini akan melambatkan pengeluaran barang-barang yang boleh dijual ataupun dibuat oleh ahli-ahli PWPK.

Keenam, PWPK menghadapi masalah ahli-ahli yang tidak aktif walaupun dari segi pendaftaran adalah ramai. Hal ini disebabkan wanita ini sibuk menolong suami, banyak anak, banyak kerja dan lain-lain yang menghalang mereka untuk menjadi aktif. Oleh itu didapati kebanyakan orang-orang yang sama sahaja yang melakukan satu-satu aktiviti yang dikelolakan oleh PWPK. Seperti contoh dalam membuat mee kuning di PWPK Kampung Air Panas Jasin, Melaka kesukaran untuk mendapatkan ahli-ahli yang sukarela membuat mee itu setiap hari jika banyak tempahan ataupun dua minggu sekali.

Ketujuh, masalah ahli-ahli PWPK yang kebanyakan terdiri daripada orang-orang tua atau yang sudah berumahtangga. Ini akan menimbulkan masalah lain iaitu dari segi kepimpinan kerana diperlukan anak-anak yang lebih muda untuk lebih bergiat kerana penglibatan mereka tidak berat seperti orang yang telah berumahtangga. Tambahan penubuhan


kumpulan-kumpulan belia seperti Belia Dusun Tua menyebabkan kekurangan ahli-ahli muda di PWPK Kampung Ulu Langat Selangor. Anak-anak muda lebih gemar untuk menyertai belia kerana pertubuhan ini bagi mereka lebih menarik kerana perpeluang bergaul dengan orang ramai. Masalah kekurangan tenaga muda juga disebabkan oleh penghijrahan kaum belia dari desa ke kota dan cuma tinggal anggota kampung yang tua sahaja untuk menyertai perkumpulan ini. Ini menimbulkan masalah tidak dapat diturunkan bakat kepimpinan orang-orang tua pada golongan muda.

Kelapan, PWPK menghadapi masalah ahli-ahli yang tidak mahu mempraktikkan kemahiran yang diberikan pada mereka dan ini amat membazir masa, wang dan tenaga. Misalnya dalam kemahiran membuat makrami, mengait yang tidak dipraktikkan untuk kegunaan rumah. Tetapi ini disebabkan oleh tiada masa lapang, kekurangan wang untuk membeli bahan mentah yang menggunakan wang mereka.

Kesembilan, PWPK menghadapi masalah tiada kakitangan dan pegawai RISDA yang benar-benar terlatih dalam memberikan latihan dan kemahiran. Pegawai RISDA juga kurang cekap mengendalikan dan mengawasi PWPK kerana mereka tidak mencatatkan segala data-data yang penting serta tidak meletakkan ukuran yang dapat dilihat kejayaan PWPK untuk perkembangan yang selanjutnya. Ini menyebabkan PWPK berjalan hanya kerana RISDA menghendaki PWPK diadakan di mana adanya PPPK dan ahli-ahlinya melakukan kegiatan seperti melepas batuk di tangga sahaja.

Kesimpulannya RISDA kurang berjaya untuk mengeluarkan wanita pekebun kecil yang bekerja di luar rumahtangga melalui PWPK oleh kerana

masalah-masalah yang dihadapi dan antara yang penting sekali ialah tiadanya susulan daripada peserta untuk menggunakan kemahiran dalam bidang ekonomi yang telah diajar itu untuk berusaha bagi menambah pendapatan keluarga.



UNIVERSITY OF MALAYA LIBRARY . MICROFILM .






Gambar 1 - PWPK Air Panas Jasin Melaka
(Kegiatan Mee Kuning)



Gambar 2 - PWPK Lubuk Redam 2 Masjid Tanah Melaka
(Kelas Jahitan)



Gambar 3: PWPK Air Puteh Kemaman, Pahang
(Kedai Jal. Jan)



Gambar 4: Park Senekabon, 17, Jalan Kray, Kelantan